

小方壺齋

小方壺齋

小方壺齋輿地叢鈔第二帙目錄

南清河王錫祺壽堂甫輯

蒙古吉林土風記

塞上雜記

東蒙古形勢考

綏服內蒙古記

綏服外蒙古記

喀爾喀風土記

庫倫記

蒙古五十一旗考

蒙古考略

蒙古邊防議

蒙古臺卡略

河套略

綏服厄魯特蒙古記

青海考略

青海事宜論

蒙古沿革考

山陽丁萬寶校

山陽阮葵生錄

常熟徐蘭著

• 林道原著

邵陽魏源著

邵陽魏源著

奉天李德述

桐城姚瑩著

天台齊召南著

甯波龔柴著

吳縣陳黃中著

錢塘龔自珍著

宜興儲大文著

邵陽魏源著

甯波龔柴著

錢塘龔自珍著

闕名

卡倫形勢記

桐城姚 瑩著

征準噶爾記

邵陽魏 源著

塞北紀程

滿洲馬思哈著

西征紀略

咸陽殷化行著

塞程別紀

山陰余 宋著

從西紀略

吳縣范昭達著

從軍雜記

桐城方觀承著

兩征厄魯特記

邵陽魏 源著

蕩平準部記

邵陽魏 源著

勘定回疆記

邵陽魏 源著

高平行記

定興王太岳著

新疆後事記

邵陽魏 源著

新疆紀略

滿洲七十一著

回疆風土記

滿洲七十一著

回疆雜記

吳江王曾翼著

西域釋地

壽陽祁韻士著

西陲要略

壽陽祁韻士著

天山南北路考略

甯波龔 榮著

回部政俗論

闕名

喀什噶爾略論

美國林樂知著

軍臺道里表

滿洲七十一著

西域置行省議

錢塘龔自珍著

新疆設行省議

闕名

西域設行省議

華亭朱逢甲著

烏魯木齊雜記

河間紀昀著

伊犁日記

陽湖洪亮吉著

天山客話

陽湖洪亮吉著

東歸日記

定遠方士淦著

荷戈紀程

侯官林則徐著

莎車行紀

蒙古倭仁著

計四十六種

蒙古吉林土風記

山陽阮葵生錄

乳筍以皮爲之平底豐下而稍銳其上捥乳盛之於取攜爲便

農作非蒙古本業今承平日久所至多依山爲田旣播種則四出游牧射獵秋穫乃歸耘耨之術皆所不講俗云靠天田

蒙古不建祠廟山川神示著靈應者壘石象山豕懸帛以致禱報賽則植木表謂之鄂博過者無敢犯革囊以革爲之用代筐筥罍盞食用鉅細無所不納行汲或以貯水涉川則挾之肘間亂流以濟或謂之皮餛飩蓋俗呼也

柴車取材於山不加刻斲輪轅略具以牛駕之行則鴉軋有聲如小舟欸乃骨占炙羊肩骨視其兆以占吉凶猶古龜卜

馬竿生駒未就羈勒放逸不可致以長竿繫繩縻致之蒙古最熟其伎

兒版兒生在襁褓中令臥版上韋束其兩臂倚氈廬壁間啼則搖之徙居則懸之駝裝之後灰簡木削兩簡編韋聯之稍空其中塗油而布以灰作字畢則拭去而更布之有古漆簡之風

竹筆蒙古產豪穎而未得縛筆之法削竹木漬墨作書

口琴製如鐵鉗貫鐵絲其中銜齒牙間以指撥絲成聲宛轉頓挫有等琵琶韻

轉經蒙古奉佛惟謹木輪中貫鐵樞可轉動集梵經於輪間大者支木架以手推之小者持而搖之旋轉如風謂一轉功德與持誦一過等

以上蒙古土風

威呼剝巨木爲舟平舳圓底層銳尾修大者容五六人小者二三人剝木兩頭爲槳一人持之左右運掉捷若飛行

呼蘭因木之中空者剝使直達截成孤柱樹簷外引炕煙出之上覆荆筐而虛其旁竅以出煙雨雪不能入比戶皆然

法喇似車無輪似榻無足覆席如龕引繩如御利行冰雪中俗呼扒犁以其底平似犁蓋土人為漢語耳
斐蘭弧矢之利童而習之小兒以榆柳為弓曰斐蘭刺荆蒿為矢翦雉翟雞翎為羽曰鈕勒

賽斐古人食皆以匕羹則以勺國俗舊用木匕長四寸許曲柄豐末猶古製也

額林皮橫板楣棟間以貯匱筐瓶罌諸器具兼几案匱匱之用

施函斲木為筩因其自然虛中以受物貯水釀酒皆用之視束鐵編篾攢木片為器者天質為勝

拉哈土壁堵間綴麻草下垂緣以施圻此國初過湖丙鞠間故俗也
拉哈壁上據棟中豎柱承梁左右留二孔出氣名麻木哈圖拉圖拉者漢

語柱也

霞綳蓬梗為幹搏穀糠為膏搏之以代燭燃之青光熒熒煙結如雲俗呼糠燈

豁山夏秋間擣敗芒楮絮入水漚之成毳漚蘆簾勻暴為紙堅韌如革謂之豁山凡紙箋胥以是名之

羅丹鹿蹄腕骨也舊俗以蹄腕骨隨手攤擲為戲視其偃仰橫側為勝負小者以聲大者以鹿鬚澤如玉

兒童婦女圍坐擲以相樂以薄圓擊之則曰帕格
又有較遠之戲趨水上以中為勝名曰祿罕

周斐樺木之用在皮厚者盈寸取以為室上覆為瓦旁為牆壁戶牖體輕而工省逐獸而頻移山中所產

不可勝用也
以上吉林土風

番僧最尊者爲呼必辣吉能悟前身人稱之曰胡圖克土華言再來人也次朝爾吉次勺熟次喇木占巴次噶卜處次溫則忒次德穆齊次合楞次合絲規次合噤爾次班第次合由巴次噶由巴次骨捻爾次顛馬女僧爲尺巴甘赤有室家者男爲吳巴什女爲吳巴三氣總名之曰喇嘛打鬼者梵言都勾是日佛殿上然燈千盞建大旗於四隅旗繪四天王像噶由巴鳴金傳執事者齊集設胡圖克土座於殿之東朝爾吉以下俱列坐一僧名茶勃勒氣散淨水於眾僧掌中無常職班第爲之几上陳胡朗叭令以醢醢拌麪作獸形蓋鬼也二甲士左右立以帛束口恐人氣觸之鬼不食也班第扮二小鬼對舞以夜叉睨其旁向內一呼卽潛入人叢中撒麪以迷人目殿內吹鋼凍西番樂器骨爲之諸樂隨之以奏合噤爾十二人戴假面扮馬哈喇佛備極殊怪雙雙跳舞而出其一曰厄利汗文殊化身二曰作嘛知文殊之護法神三曰嘛哈噶喇四曰喇嘛皆觀音化身五曰威叉叭喇六曰滋那噠哈七曰著噶阿拉哈八曰冬琨著煞九曰生合冬東十曰出孫冬東十一曰煞拉瓦十二曰摸黑皆觀音之護法神也惟厄利汗煞拉瓦爲牛鹿扮面餘皆不可辨合楞十人扮十地菩薩錦衣花帽繼之而出手執腦骨碗骷髏捧父桿綵縷等物旁立番僧數百人持鼓與鉦鼓鉦之徐急隨其跳舞之節奏赤甘巴出吳巴什夫婦執香環繞溫則忒宣開經偈眾僧朗誦秘密神呪吽聲如雷鈴聲如雨喇木占巴以胡朗叭令擲於地於是牛鹿二假面持刀砍地作殺鬼狀復有一僧曰乃冲戎裝執戟吐火吞刀云神附於身觀者皆膜拜奉單細於神以問休咎跳舞畢合由巴以糖一鉢候於戶抹眾僧之口而佛事終焉譯者曰烏斯藏有碉房爲邪崇所據白晝攫人飲食喇嘛乃扮假鬼於房中飲食以誘置鬼因扮諸佛排闥以入而打之故名之曰打鬼今○京師番僧寺上元除夕亦爲之蓋猶周禮帥百隸以時儺之意也

蒙古碁者局縱橫九綫六十四罫棋各十六枚八卒二車二馬二象一礮一將別以朱墨將居中之右礮居中之左上於將一罫車馬象左右列卒橫於前此差同乎中國者也其碁形而不字將刻塔崇象教也象刻駝或熊也北無象也多卒人眾以爲強也無士不尙儒生也碁不列於綫而列於罫置器於安也馬橫行六罫駝橫行九罫以駝疾於馬也滿局可行無河爲界所爲隨水草以爲畜牧也卒直行一罫至底斜角食敵之在前者去而復返用同於車嘉有功也眾碁還擊一塔無路可出始爲敗北考象戲始於周武帝司馬溫公損益其法爲古局象碁圖蒙古此戲其仿中國或以意創爲皆不可知然國人爲之亦遂有工拙之不同焉

喀赤哈者羊膝髀骨也骨分四面有棱起如雲者爲珍兒珍背爲鬼兒俯者爲背兒仰者爲梢爲此戲者各記一骨爲馬兒以二骨卜地分甲乙珍先於鬼背先於梢甲以骨若干對拋於地珍鬼背梢從其類以彈之間有豎立者愁必負因其類之難得也中則取若彈此而擊彼則前之所取皆罰出不中乙檢餘骨復拋而彈終計所得之多寡爲勝負馬兒爲人得去倍其數以續

龍珠在領蛇珠在口魚珠在目鮫珠在皮鼈珠在足皆不及蚌珠之在腹者其用普嶺南珠色紅西洋珠色白北海珠色微青皆不及東珠之色如淡金者其品貴東珠產遼之松花江源出天池鼈荒萬里人迹罕至是水皆有蚌是蚌皆有珠八旗皆有採珠人剝木爲舟溽暑入江以一木插中流沒如沈鼈出如輕鳧與魚龍並游而不相害額設將軍都統以監之珠八分以上者充貢次歸其主細碎者禁勿取歲終以勤惰高下其賞罪人免死者發烏喇差遣或助此役初學者以長繩繫腰入水取蚌急則振繩挈之而起旣而習於水勇於泅轉相傳授習以爲常邊植柳爲界軼出者怪鳥鳴喚其前邏者蹤迹之卽得無一人亡者而川澤之利其用遍於天下矣

遼東之山皆產貂貂穴空樹中日伏夜出捕食蟲物土人以時取之秋冬之交入夜隕霜封樹風搖樹顛墮地如積雪貂行霜上迹可數也土人張毳幕以幕爲居畜三犬一守一逐獸一打貂其打貂者名跟蹤跟蹤云跟貂霜上之蹤者也土人視跟蹤所前得其樹樹多孔塞之留上下上張以網下薰以煙貂畏煙緣木而上入網就獲矣又曰貂食鳥雀飽則宿樹杪跳枝竄葉疾如疾電間以木弩射得之

遼東產蔓之地有二近者鷹額口遠者江獺鷹額在○盛京東三百里產蔓少江獺在甯古塔東北去○盛京可五千里產蔓多故人皆舍近而趨遠歲於春三月裹糧行秋七月至其地至則伐木列柵推一人爲長曰山頭眾隨其所之期盡一峰而返人皆以布囊蒙首留二目如面具左手然朽木以驅蠓蟻右手持銳木以禦虎豹披荆棘犯霜雪而求之雖山崩水溢勿顧也夜歸柵中蔓或蒸或煮實以綫炙乾之聽怪獸之聲繞柵而號巖谷震動間失道暮宿樹杪嚼蔓以代食強弱不敵多爲人所劫害霜降以後草木黃落無從辨其根荄採蔓之人於是乎歸蔓之性背陽向陰喜卑溼地雖草長至尺而苗必高出其上其根遇鐵則爛其苗隔歲一茁未茁者名啞蔓如花之歇枝也然採之者有幸有不幸焉或終日不獲一或舉一而遇百或數十步外望之有光或以足踐之而不見其形三桎五葉相對而生一莖獨上而有七節開花如蓍結子如豆由青而黃而紅有異雀黑色而小羣飛啄食之蔓子非從雀腹中過墮地則不甲坼其叢生樹下雖物性使然亦雀矢所遺者多耳

東蒙古形勢考

林道原著

塞外迤東爲承德府卽俗號熱河以溫水取名南界萬里長城北達西伯利亞西界獨石口西北界多倫諾爾俗作喇嘛廟東以柳條邊東北以○盛京所屬爲界截長補短東西約千里南北約千五百里由巴林往北全係蒙古韃子罕有漢民該處民別四等曰漢人曰蒙古曰旗人曰回民以都統一員總握治權并有兵備道知府旗員卽總管各助答等分猷助職各官皆駐紮熱郡領府州縣七曰平泉州俗號八溝曰建昌縣俗號西塔子溝曰朝陽縣俗號三座塔曰赤峯縣俗號哈答曰糧捕府卽近開闢場之處因官挂同知銜故有是名然其權與州縣同例曰豐甯縣曰灤平縣又分縣數座曰嚙牛營子曰公主陵大廟曰四家子曰黃瓜屯曰大皋兒曰鞍匠屯曰科樂溝等散廳復有藩王曰喀喇沁旗盟長曰翁牛特卽俗名傲牛王者是也曰烏公貝子曰敖漢曰土木特曰五單貝子曰柰曼曰巴林王盟長伊等雖尊爲貝王然官詞訊斷賞罰之權凡屬巨案全由漢官主掌其地形勢正南西南兩處崇山峻嶺疊疊如屏由山海關達張家口西至萬全縣長約二千里闊約二三百里登樓而望則山山相接不見平川復有黑河潮河灤河及青龍等河流繞其間跋涉之難行旅者以爲險境前聞萬里長城樓閣有三里一堞五里一臺之說而不知非也嘗詳視大勢堞臺相隔有一二里者亦有數十步者遠近不同由東南達西北二千餘里樓臺牆壁悉以砌石甃瓦堅木繫築且歷經修補多屬整齊非若迤西土牆坍塌不堪止贖土塼而已由此以觀昔中國懼東北之匈奴遠勝于西北故以此等堅固之城禦之其樓基牆基特選高山絕頂凡峰巒銳處必有高樓自下而上形若立錐高可十餘丈四無登涉之途鏡光大石及甃瓦等物不知昔人如何向上運動樓作方形每面外有棖窗三內有棖洞九每洞可容四五人復有梯由梯而上乃見平臺西圍欄杆礮眼徧設極目而望長城高下下委宛迤邐遶無邊涯若老龍延袤長蛇之起伏也牆寬丈餘

高不足三丈最高處有一樓俯首下視見牆下山嶺齊拱目前始知秦皇北築長城實爲勞民傷財之舉也

綏服內蒙古記

邵陽魏 源著

蒙古諸游牧國之大名也十七行省及東三省地爲中國自中國而西回部而南衛藏而東朝鮮而北鄂羅斯其民亦皆土著之人其國亦皆城郭之國若乃不郭不宮室不播殖穹帳寄而水草逐者惟瀚海南北部及準部青海諸部則然故史傳外夷皆以居國行國爲大界畫而游牧行國又以瀚海爲大界畫若漢匈奴賢王有左右一居東方以接襍貊一居西方以接氐羌而單于庭直代其攘之則還於漠北至後漢而爲南單于北單于再變爲東胡西胡三變爲柔然爲東西奚四變爲東突厥西突厥五變爲內回紇外回紇上下數千年離合絕續皆以大漠爲諸部之綱維於是乎左於是乎右於是乎南於是乎朔其擴入版圖列爲郡縣者惟唐初蕩平突厥之地置定襄雲中等郡領於單于瀚海二都護一時稱極盛而控御不久遼金置上京中京西京諸道僅域於東西奚而未及河朔惟元起漠北奄有函夏於漠南置大甯上郡興和大同等路於漠北置和林行中書省以至西域青海皆分建諸王駙馬爲古今戎索之一變明之中葉元裔由漠北入漠南於是邊防復棘且其根柢盤固支條蔓衍爲今蒙古各部汗王環處大漠故○○○高宗言三代以後惟元太祖裔至今不絕云最其部類大分有四曰漠南內蒙古曰漠北外蒙古曰漠西厄魯特蒙古曰青海蒙古四部中漠南內蒙古接壤滿洲臣服最先至康熙初而漠北喀爾喀三部內款及○○○親征準噶爾而青海諸部來庭於是三大部蒙古皆混爲一家惟漠西厄魯特恃其荒遠抗衡狂妄至乾隆中始夷其疆域空其部落焉漠南漠北二部大半出元太祖成吉思汗至今世姻○○○帝室其西海則元之旁支西域則元之臣僕至今惟通朝貢與稱外戚甥舅者殊科因而區之以昭戎索

內札薩克蒙古六盟東四盟當○盛京黑龍江及直隸邊外西二盟當山西陝西甘肅邊外凡四十有八

旗二十有四部并歸化城土默特則二十有五東抵吉林黑龍江界西至賀蘭山南界長城北距瀚海絡
雍冀幽并營五州北境袤數千里明初悉攘諸漠北中葉復薦食漠南邊患遂興明代相終始我○朝龍
興首臣科爾沁繼平插漢即察於是諸部先後來庭有大征伐率師以從世其封爵時其朝貢凡二十五
部爲五十有一旗其制略與在京內八旗蒙古等其朝覲分爲三班其會盟則若科爾沁若郭爾羅斯若
杜爾伯特若札賚特四部爲一盟其盟所曰哲里穆其貢道由山海關若札魯特若喀爾喀左翼若奈曼
若敖漢若翁牛特若阿魯科爾沁若巴林若克什克騰八部爲一盟其盟所曰召烏達其貢道由喜峰口
奈曼即元史所謂乃蠻也元太祖既平乃蠻以封其子故後人因以名部蓋先得漠北後得漠南也若土默特若喀喇沁二部爲一盟其盟所曰卓索圖其
貢道亦由喜峰口若烏珠穆沁若浩齊特若阿巴哈納爾若阿巴噶若蘇尼特五部爲一盟其盟所曰錫
林郭爾其貢道由獨石口以上爲東四盟內蒙古若四子部落若喀爾喀右翼若茂明安若烏喇特四部
爲一盟其盟所曰烏蘭察布其貢道由張家口又鄂爾多斯一部七旗牧河套內自爲一盟其盟所曰伊
克臺其貢道由殺虎口以上爲西二盟內蒙古每三載盟會之期○命大臣齎勅以往設正副盟長各
一以簡軍實閱邊防理訟獄審丁冊惟歸化城土默特向隸將軍都統及各廳同知不設札薩克故會盟
集於本城不設盟長聽○簡命大臣蒞視其各部每旗事權皆掌於札薩克一人此外皆散秩其親王
郡王貝勒貝子鎮國輔國公台吉等或以功晉封或以事襲無定員初元太祖起和林削平西北諸國建
王駙馬等世守之爲今內外札薩克蒙古所自出而仲弟哈薩爾以射聞季弟勒格圖以勇聞佐命功尤
大今之阿巴噶阿巴哈納爾二部皆勒格圖後也兩科爾沁及札賚特杜爾伯特郭爾羅斯四子部落茂
明安烏喇善青海和碩特九部皆哈薩爾後也又有太祖十五世孫達延車臣汗者建庭和林支裔繁布
於漠南北若奈曼巴林敖漢蘇尼特烏珠穆沁鄂爾多斯克什克騰喀爾喀左右翼九部皆其後也翁牛

特則太祖弟諤楚因之後札魯特及土默特右旗則太祖十八世孫之後惟喀喇沁及土默特左翼爲太祖功臣濟拉瑪之後餘皆元子孫皆以插漢部爲大宗其歸○本朝也皆以林丹汗不道之故今不悉述述其尤著者

天聰九年○○○太宗文皇帝得傳國璽於元小王子裔插漢部於是蒙古四十九貝勒及土默特兩旗合上尊號改元崇德是爲我○大清受命之始前此○○○太祖天命中臣服諸國除瀋陽遼陽得自明外餘若黑龍江五部長白山二部東海三部扈倫國四部凡河東河西之地使犬使鹿之邦明人所稱南關北關者皆金代部屬語言相同城郭之國非蒙古行國也其時已與科爾沁盟好而與插漢構釁插漢部者元之嫡裔大宗也初順帝北歸和林連易五主始去國號稱韃靼可汗皆在洪武之世永樂初本雅失里可汗爲阿魯台所立宣德中脫脫不花可汗爲瓦剌酋長脫歡所立景泰中也先篡之不久部下仍立脫脫不花子號小王子自是世以小王子稱正德中小王子尤強并青海及烏斯藏控弦十餘萬嘉靖中稍厭兵徙幕漠東邊外稱土蠻而分諸部落留西北邊其時邊防皆急河套青海及俺答封西郵奠於是東部土蠻小王子裔數入寇邊患又中於薊遼故明世邊寇曰河套部河西部河東部西則今青海蒙古東則今內札薩克蒙古套則今阿拉山及鄂爾多斯蒙古也至西厄魯特則五刺王脫歡也先之裔明中葉後罕入寇或言厄魯特即明之阿魯台者誤也阿魯台世與瓦剌相仇殺且一東一西部落判然厄魯特既爲瓦剌之裔安得復爲阿魯台之裔邪况阿魯台人名非落部之名也厄魯特之稱猶唐古特猶韃靼安得以人名當之乎而北部喀爾喀蒙古隔於大漠終明世不見於史云萬厯中我○大清兵起明人思

用東部插漢小王子即察哈爾欲以敵○大清而要挾歲賞終無成效末年林丹汗土馬強盛橫行漠南有宋

康武乙之暴天命四年來聘書稱統領四十萬眾蒙古國主巴圖魯青吉斯汗致書水濱三萬眾滿洲國主且恃其號勅馮陵諸部諸部先後獻歸○大清請師援救天聰八年六月○○○太宗統大軍盡徵各

部蒙古兵征察哈爾時遼河夏漲晝夜盲潦出其不意逾內興安嶺千三百里至其庭林丹汗謀拒戰而所部解體遂徙其人畜十餘萬眾由歸化城渡河西奔沿途離散十之七八林丹汗走死於青海之大草灘我大軍至歸化城收其部落數萬而還明年其子額哲率所部奉傳國璽來降封親王位冠四十九旗貝勒之上其眾編旗安置義州額哲卒其弟囊爵傳至布爾尼當康熙十四年吳三桂之變徵其兵不至旋煽柰曼等部擁眾同叛○詔不附逆各部蒙古會兵討之六閱月平空其故地置牧廠隸內務府太僕寺而移其部眾游牧於宣化大同邊外共八旗分東西二翼其旗內官地及與漢民互市訟獄治以四旗廳及獨石口張家口豐鎮甯遠各廳其本旗事務轄以都統等官而總隸於理藩院典屬司此八旗在蒙古四十九旗外官不得世襲事不得自專與各札薩克君國子民者不同其故地袤延千餘里在獨石口張家口邊外又歸化城土默特者明順義王俺答之後也中爲察哈爾所滅我○○○太宗親征察哈爾駐蹕歸化城降其部眾編爲二旗以其部長爲左右翼都統并還其世所守順義王印而遣將軍駐其城鎮守之乾隆中并裁都統其旗務則掌之將軍副都統惟存輔國公世爵一不理事并設同知通判理旗民賦訟與○京師內八旗蒙古相等而與插漢小殊故新疆各省駐防有察哈爾蒙古兵無土默特蒙古兵

科爾沁部在喜峰口外東西距八百七十里南北距二千有百里南界○盛京邊牆北界索倫本元太祖弟哈薩爾之後明初置兀良哈三衛之一也後自立國曰科爾沁明洪熙間爲厄魯特所破東避嫩江以同族有阿魯科爾沁因號嫩江科爾沁以自別其札賚特杜爾伯特郭爾羅斯三部皆科爾沁一部所分兄弟同牧皆屬插漢部我○○○太祖初年科爾沁與葉赫哈達烏拉輝發錫伯卦爾察珠含理納殷共九部之師二萬來侵攻赫濟格城不下陳兵古峙山○○○太祖親禦破之逾數年復征烏拉部敗科爾